

# UVODNIK

**P**rvi odjeljak ovoga dvobroja *Znakova vremena* posvećen je Mehmedu Džemaludin ef. Čauševiću, nekadašnjem reisul-ulemi Islamske zajednice, reformatoru i prosvjetitelju, angažiranome intelektualcu i poborniku praktičnog odnosno institucionalnog među-religijskoga dijaloga, komentatoru čuvene Mesnevije i sljedbeniku derviškog reda mevlevija, čija pregnuća su dala velikoga zamaha vjerskom i kulturnom razvoju bosanskih muslimana u prvoj polovini dvadesetog stoljeća, a čiji lik i djelo i dan danas slove kao primjer odgovornog i zrelog razumijevanja i odnošenja prema kur'anskoj ideji vremena i historije.

U drugom odjeljku pod naslovom *Religija i društvo* objavljujemo tekst Harisa Islamčevića u kojem se razmatraju povijesna i kulturna ishodišta „nove religioznosti“ koja se javlja kao logična posljedica krize tradicionalnih formi pobožnosti u modernim društvima.

U odjeljku pod naslovom *Tesavvufske teme* donosimo tekst o životu i duhovnom odnosno praktičnome djelovanju šejha halvetijskoga derviškog reda Hamida Valija, poznatijeg kao Somundžu baba.

Četvrti odjeljak *Međureligijski dijalog* sadrži tekst Marka P. Đurića u kojemu autor govori o teološkim putevima koji su zajednički islamu i hrišćanstvu, a koji hrišćane i muslimane mogu približiti u zajedničkom vjerovanju u jednoga Boga Stvoritelja svih svjetova.

Sljedeći odjeljak *Refleksije* sadrži tekst Saeida Abedpoura u kojemu se reflektira stajalište o povijesnoj znanosti Ibn Halduna, utemeljitelja suvremene sociologije i jednog od najprominentnijeg mislioca muslimanske klasike.

Šesti odjeljak *Ogledi* predstavlja rezultate komparativne studije stavova bosanskih, hrvatskih i pakistanskih učitelja prema kooperaciji u socijalnim konfliktima.

U sedmom odjeljku *Kritička čitanja* direktor Naučnoistraživačkog instituta „Ibn Sina“ Rouhollah Ghaderi temeljem povijesnih i doktrinarnih argumenata nastoji dokazati da islam nije religija konflikta i terora odnosno da se duh islama snažno protivi svakom obliku političkoga ili bilo kojeg drugog oblika nasilja.

Slijedi potom odjeljak pod naslovom *Politika i pravo* u kojem Džemal

Najetović razmatra korijene odnosno uzroke i posljedice te kronologiju izraelske vojne ofanzive “Zaštitna linija”.

Osmi odjeljak posvećen je *Gender temama*. U njemu objavljujemo tekst Almase Zubović koja piše o ključnim razlozima za implementaciju ravnopravnosti spolova u partnerstvu Europske unije sa zemljama u razvoju.

U desetom odjeljku *Kulturno-historijske teme* donosimo dva teksta. U prvome Ahmed Zildžić predstavlja buyruke kao pisane izvore alevijske tradicije, govori o etimologiji naziva ovih izvora, njihovim najznačajnijim tematskim odrednicama, te na kraju donosi prijevod jednog sarajevskog buyruka na bosanski jezik uz neophodne prateće napomene. U drugome tekst Alija Dilberović piše jednu bilješku o Vučjakovića i Koski-pašinoj džamiji iz sedamnaestoga stoljeća koja zapravo predstavlja vrijedan prilog proučavanju biografije Ahmeda sina Mustafe Mujezinovića (Muezin-zade).

U jedanaestom odjeljku *Književno-historijske teme* donosimo tri teksta. U prvome Esad Duraković piše o poetici Rumijeva djela, u drugome tekstu Abdülbaki Gölpınarlı predstavlja Pir Sultana Abdala, jednog od sedam najvećih alevijskih pjesnika, dok u trećem tekstu Mehmed Kico govori o kosmopolitizmu Nedžiba Mahfuza u ogledalu prevođenja.

Dvanaesti odjeljak pod naslovom *Studije o genocidu* sadrži tekst Ermina Kuke u kojemu se na primjeru Bosne i Hercegovine raspravlja o uzajamnom odnosu politike genocida i etniciteta te posljedicama negativne percepcije takvoga odnosa.

U trinaestome odjeljku *Ratni zločini* također donosimo jedan tekst u kojemu Muamer Džananović ukazuje na brojne oblike zločina protiv čovječnosti i međunarodnoga prava izvršene za vrijeme trogodišnje opsade Goražda.

I ovaj broj zaključujemo ocjenama i prikazima knjiga. Šefket Krcić donosi osvrt na knjigu *Bošnjaci u Turskoj*, autora Amira Hodžića i Mirsada Kalajdžića; Fikret Bećirović predstavlja knjižicu *In Facto* autora Safeta Sarića, piše o odvažnosti njegove kritičke misli; Azra Gadžo-Kasumović predstavlja knjigu Fazilete Hafizović *Opširni popis timara mustahfiza u tvrđavama Kliškog sandžaka iz 1550. godine*, a Zoran Vračan piše prikaz knjige *Filozofske rasprave*, autora Milenka A. Perovića.

---

Adnan Silajdžić